

Zboa priader en Ungarn

Gschicht passiert zbischn en 1841 ont en 1842, s ist a borata gschicht pet borata lait.

S ist gaben der 28 va leistungst 1841, der Matteo ont der pruader Minele, sai' noch gaben za kearn um van a mol as de sai' gaben en filò ka de morosa van Minele, de Margheritina van Roudler, tochter van Tone Schneider.

- Boast as en doi to, der Capo Comun, der Minele Corn, hòt mer kein as der Imperatore Ferdinando I, van schanmikeal lòkt ens gea' za hausiar vour van 24 jor aa... i hòt tschechen abia de schaugst de Margheritina, men sicht as de tants za gearn haiertn, ont de hòt gamòcht de 24 jor vour a por mu'net.

De mechest kemmen pet miar za gabingen a ker gèlt za kaven der a haus ont meing de haiertn pet de Margheritina.

S ist schoa' an ettla jor as I gea' za hòndln, benn de billst en an ettla bochen meiber gea'. -Hòt er kein der Matteo.

Der Minele hòt se nèt gabòrt za hearn der Matteo klòffen va de Margheritina ont der ist lai guat gaben za song – Jo s ist rècht. -

Song sn en tata, der Pero, ist nèt dester gaben, ont nou minder en de Mare, de Ana van Boller, bavai de hom nou tsechen der Minele abia a piabl.

- Dai Mare, i pin i pet im, s ist schoa' sim jor as I hausiar pet en Filzer, ormai pin i an òltn Krumer!- hòt er probiert za convinzern sa.

- Ma s ist nou a piabl, du ont der Pare hòt gabòrt finz as de draisk jor za geà, der mu bòrt er aa. Ont dòra do hoa'm hòt s vil òrbet za tea', ont der Pare ist va vil jor as der hòt runt bea' en puckl. -

- Ver de òrbetn bare I tea' - hòt er kein der ònder pruader van Minale, der Nane – Der Minale hòt a groasa noat va gèlt, hòt nèt tsechen as der ist òll to kan Roudler? S ist zait as der tuat se haiertn benn der billt nèt as oa's ònders stelltn s baib! I hòt nèt noat za gea' za hausiar, lòn en gea' im en mai' plòtz. -

S ist gaben asou as òlla hom tschbing ont as der Minale hòt gamecht gea'.

Zboa to derno, en pfinsta, de zboa priader sai' gaben za òrbetn en de acker en Bollerhoff, bou de sai' plim pet de sai'na eltern.

- De hom mer kein as der Nane ont der Cristele barn gea' as de 15 van Schanmikeal, ber miasn vort gea' pahenner! S sai' de Krumer mear kent va Vlarotz, benn de gean ens vour verliaber òlla de lait as tannentn kaven en Sudtirol ont Baiern- hòt er kein der Matteo.

- i pin paroot, hai't lò me gea' za griasn de Margheritina, ont en ma'ta vria gea ber.- hòt er kein der Minele.

- I mias der song eppes Margheritina... - hòt er kein der Minele.

- Sog mer ... - hòt se kein de Margheritina.

- Sèll to, bail as I ont der Matteo sai' umkeart hoa'm, er hòt mer pfrock benn i gea pet im za hausiar ver an ettla mu'net. Dòra bar e umkearn pet a ker gèlt ont magare, ehm, benn de billst... dòra bar ber ens meing haiertn.

- Jo Minele, i verhoas der as i bar de bòrtn. - hòt se verhoasn de Margheritina.

Ont asou der ma'ta no der Minele ist vòrtgongen kontent petn Matteo.

-Ber miasn mòchen der glaiche be as ber mòchen za gea' ka Baisnstoa' - hòt er kein der Matteo – ber gea' vir va Palai, ber gea iber de perng finz en Val Cadin, dòra mòchber aus de Val di Fiemme finz en Val di Fassa, ont dòra gea ber ka Nova Levante. Va semm bar ber sai' schubet en Poazn.

Der Matteo ont der Minele sai gaben jung ont stòrch, ont no zboa to, sai sa aribart en Poazn.

De hom se lai augahòltn a nòcht en Predazz.

- Guten Morgen, ber sai' do za kaven stoff, batu'n, zbirn... - Asou der Matteo hòt galeart en Minele bos za kaven, s beil as ist gaben s zaig pèsser ver za dòra verkaven en de haiser.

- Doi nòcht bar ber do stea', morng bar ber gea' dorf ver dorf finz en Innsbruck, bou ber tea' an anders vòrt innkaven kan Junger- hòt er u'stimmt der Matteo, bail as der Minele hòt tschbunnen en bichteste zaig.

En to no en de vria sai' sa vòrtgongen za vuas keing Prixen, ober schoa' en Prato all'Isarco, hom sa spirt as e hòt gahòt eppes as ist nèt gòngen.

- S sai' schoa' verpai gòngen de enkern lòntlait vour drai to – hòt s kein an òlts baibl as ist noch gaben za baschn a virta kan prunn – de hom schoa' verkaft en òlla de haiser, der sait spat. -

- Oh no, de sai schoa' verpai, alura ist nèt bor as de sai vòrt en de 15 van Schantmikeal - hòt er kein der Minele. - De barn sai' vòrt va hoam schoa' 4-5 to vour, ber sai' za spat almen va 3 to – hòt er kein der Matteo.

- Hòt s nèt an plòtz bou de gea' nèt vir?- hòt pfrock der Minele. - Na va do dòra tea'se se toaln, ont va Poazn finz en Innsbruck kimmپ ausgamòcht òll lantl – hòt er kein der Matteo.

- Alura bos konnt ber tea'? - vrokt er der Minele – lòg me sn drau tschbinnen a ker, derbail gea ber keing Innsbruck – hòt er kein der Matteo.

Benn de sai' aribart en Innsbruck pet de Kraks nou voll va zaig va Poazn, hom sa aus gamòcht bos za tea': Gea' keing de Boemia ont dòra gea' nou baiter ont gea' keing Ungar.

- Guten Morgen, ber sai' zboa Krumer van Bersntol! Ber hom an schouber zaig za verkaven benn der billt sechen. - Ist er noch gaben za song der Matteo en an mònn en an dorf unter Praga. - Ber hom gamias kemmen finz do bavai ondra krumer sainens vourgòngen. -

Derbail der Minele hòt trunken a ker bòsser kan prunn, s'ist gaben schoa' zboa mu'netn as de sai' vòrtgongen. S ist gaben pòll Bainechn ont s ist gaben schecket kòlt, ober de hom gamiast villn de Kraks mear as 10 vert ont de hom guat verdea't.

- Boast Minele i hòn tschbunnen za villn inn de Kraks va hailega pilder do en Boemia ont d'ora gea' en Ungheria. I hòn gaheart kontarn as der nono h'ot s es gatu' òll jor. I tschbinn as ist nèt asou vèrr, ber meing verdea'n an schouber gèlt ont d'ora meig ber umkearn hoa'm.- h'ot er kein der Matteo.
Za hearn kl'offen va hoa'm en Minele istn kemmen za rearn. Ober za tschbinnen za kearn um ka de Margheritina pet souvle gèlt h'ot er kein va jo.

De Ungheria ist nèt gaben asou glaim abia as h'ot tschbunnen der Matteo. Bail en roas an etla diam hom stouln en de priader òlder s gèlt, ober de hom en gal'ok òlla de hailegler, de hom tschbunnen as de sai' bea'ne bèrt.

Der Minele ont der Matteo sai' aribart en Ungheria mia ont a'ne gèlt ober de hom gahoft za meing gabingen a ker gèlt pet de hailegler.

- Guten Morgen, ber sai' krumer van Bersntol, ber sai' do za verkaven hailegler abia de ingern none. - h'ot er kein d'os vort der Minele.

De sèlln as hom tsechen de hailegler ho kein: - jo i bill der – ont de ondern as sai' semm gaben hom kein – i aa, i aa -.
Òlla hom gabillt hailegler za gadenken se va sai'na none.

Asou de zboa priader hom aus gam'ocht za kear um an ònders v'ort en Boemia ont mòchen an òndern roas za verkaven òndra hailegler en Ungheria.

S ist gaben as de 10 van merz van 1842 benn as der Minele ont der Matteo hom bider tsechen s sai' haus va vèrr asn Eck va San Lorenz.
De hom verdea't mear as tausnt lire, an schouber gèlt, asou vill as benn as de hom s es kontart, de lait van l'ont hom en kein de "Milorde".
Speiter petn sèll gèlt hom sa kaft der gonze hoff Ronca ver za gea' za lem semm pet òlla de sai'na lait.
Der Minele ist garo hoa'm aribart, der h'ot postart de kraks ont h'ot en gem s gèlt en sai' pare, ober lai a s'och ist bichte gaben ver im: - I gea' za vinnen de Margheritina-.